



ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱՐՄԱՎԻՐԻ ՄԱՐԶԻ

ԱՐԱՔՄԻ ՀԱՄԱՅՆՔԱՊԵՏԱՐԱՆ

Հայաստանի Հանրապետության Արմավիրի մարզի Արաքս համայնք,
գ. Գայ, Ա. Խաչատրյան-1

01 սեպտեմբերի 2024

ՇՆՈՐՀԱՎՈՐԱԿԱՆ ՈՒՂԵՐԶ ՍԵՊՏԵՄԲԵՐԻ 1-Ի՝ ԳԻՏԵԼԻՔԻ ԵՎ ԴՊՐՈՒԹՅԱՆ ՕՐՎԱ ԱՌԹԻՎ

Սիրելի՛ աշակերտներ, ուսանողներ, հարգարժան ուսուցիչներ և դասախոսներ,
կրթական ոլորտի պատասխանատուներ, ծնողներ,

Շնորհավորում եմ սեպտեմբերի 1-ի՝ Գիտելիքի և դպրության օրվա կապակցությամբ:

Սիրելի՛ աշակերտներ և ուսանողներ, յուրաքանչյուր պետության գլխավոր ներուժը
խելացի և կրթված հասարակությունն է: Դուք պետք է գիտակցեք, որ գիտելիքը ձեր
ապագան է, ճանապարհը դեպի մեծ կյանք: Այն ձեզ հնարավորություն կտա գտնել ձեր
տեղը ժամանակակից աշխարհում, դառնալ ձեր երկրի, համայնքի արժանավոր
քաղաքացիներ:

Կանաչ ճանապարհ եմ մաղթում նոր ուսումնական տարում առաջին դասարան
հաճախող մեր երեխաներին և այն երիտասարդներին, ովքեր ընդունվել են
բարձրագույն ուսումնական հաստատություններ:

Ձեզ հետաքրքիր իրադարձություններով լի ու կարևոր տարիներ են սպասվում: Բոլոր
ժամանակներում գիտելիքն ու կրթությունն են եղել այն հիմնական հենասյուները,
որոնցով մարդը կարողացել է հաղթահարել ամենատարբեր մարտահրավերներն ու
խնդիրները:

Հարգարժան ուսուցիչներ և դասախոսներ, յուրաքանչյուր ուսումնական տարի մի նոր
մարտահրավեր է ձեզ համար, նոր սերունդներ կրթելու ձեր բարդ ու պատասխանատու
աշխատանքի ճանապարհին: Ձեր ուսերին են դրված ոչ միայն աշխատանքային կամ
մասնագիտական պարտականությունները, այլև սերունդներին որակյալ կրթություն
տալու շնորհիվ գիտակից և արժանապատիվ քաղաքացի ձևավորելու
պատասխանատվությունը:

Մեր երախտագիտությունն ենք հայտնում ձեզ՝ ձեր կատարած աշխատանքի համար և
մաղթում քաջառողջություն, համբերություն և երկար ու խաղաղ աշխատանքային
տարիներ:

Սիրելի՛ հայրենակիցներ, մեկ անգամ ևս շնորհավորում եմ բոլորիս Գիտելիքի և
դպրության օրվա կապակցությամբ:

ՀԱՄԱՅՆՔԻ ՂԵԿԱՎԱՐ՝ Ղ. ՂԱԶԱՐՅԱՆ